

4

~~XXXX.~~

DISSERTATIO INAUGURALIS
HISTORICO-MEDICA
DE
ANTIQUA
MEDICINAE DIVISIONE

IN
διαίτησιν, Φαρμακείῃσιν, et χειρουργίῃσιν.

QVAM
FAVENTE SUMMO NUMINE
IN ALMA IVLIA CAROLINA
GRATIOSI MEDICORVM ORDINIS
AVCTORITATE ET CONSENSV
PRO GRADV DOCTORIS
SUMMISQVE IN MEDICINA HONORIBVS
RITE OBTINENDIS
D' XXX SEPTEMBER' MDCCLXVI
HORIS ANTE ET POST MERIDIEM CONSVETIS
PVBLICE DEFENDET

AVCTOR
MARTINVS IACOBSEN
ALTONANVS

HELMSTADII

TYPIS VIDVAE SCHNORRIAE, ACADEM. TYPOGR.

0 1 2 3 4 5 6 7 8 9 10



THESES AD DISPUTANDVM.

- I. Nihil fortasse medicos magis latet, quam natura febris.
- II. Perpetui febris a causis internis ortae quasi comites sunt horripilatio, pulsus velox, et calor.
- III. Sola tamen pulsus velocitate medicus febrem adesse indicat.
- IIII. In statu morbi corrupti, qui post febrem et haemorrhoides turbatas minatur, maior spes fulget, febrem, quam haemorrhoides reuocandi.
- V. Hydrops ex visciditate et metastasi febrili, dummodo viscera nondum grauius laesa, & dulc. leuatur.
- VI. Veteres medici in distinguendis constituendisque pulsuum generibus et differentiis nimis copiosi fuerunt et subtiles.
- VII. Difficile dictu, quid in corpore aegroto eueniat tempore *νεκρωσεως*, aut quo pacto fiat, vt vincatur morbus, natura superior sit.
- VIII. Mirum, lienis usum et functionem medicis nondum innotuisse satis, cum tamen et Anatomia et Physiologia tanta hodie augmenta ceperit.
- VIIII. Quamuis hodie, quae est seculi nostri felicitas, nouis illis inuentis, vt sanguinis circulo, aliisque rebus veteribus ignotis vt liceat, multum tamen abest, vt morbos et illorum effectus a priori intelligere possimus.
- X. Schirrhus est tumor durus et indolens. Cui si dolor accedit, cancer oritur. Cancer itaque a scirrho non nisi dolore differt.

☆ ☆ ☆

MONSIEUR

Je vous prie de croire que c'est avec un vrai plaisir, que je vous fais mes remerciemens de ce qu'il vous à plu en m'invitant à vous proposer mes doutes sur VOTRE savante dissertation, me procurent l'occasion de m'instruire par vos Lumieres. Agréez que je vous felicite MONSIEUR de cette épreuve que vous donnez publiquement de VOTRE erudition, et que je souhaite de tout mon coeur que vous recueilliez bientôt le fruit de vos veilles. Je suis avec un parfaite consideration, et un attachement veritable

MONSIEUR

*Helmstedt,
le 28. de Septembr.
1766.*

*Votre très humble Serviteur et
très dévoué ami*

HANS JOACHIM COMTE D'AHLEFELDT.

V I R O

PRAENOBILISSIMO ATQVE DOCTISSIMO

MARTINO IACOBSEN

S. P. D.

IOANNES TRAVGOTT ADOLPH

M. D. ET P. P.

*E*iusmodi sane prodidisti iam doctrinae TVAE specimen, quale dudum exspectaueram, qui TE TVOSQUE novam amores Latii Graeciaeque veteris, unde scientiarum omnino primordia ad nos promanarunt. Etiam nunc hos fontes adire iuvat quam maxime, quos posteritas quantumvis sera nec exhaustit, neque siccabit unquam. Sed plurimos nostrorum temporum absterret itineris huc difficilis taedium, atque paucorum eludatur peruvicacia. Habentur autem praestantiora, quae rara. Eximiae proin Laudis commendationem TIBI MET IPSE paravisti, dum, quibusnam finibus circumscripta processerit ars medica pristinis illis CELSI temporibus, post aliorum egregiorum virorum operam, iterato inquisivisti. Erunt forsitan, qui totius artis exercendae onus censuebunt maius, quam quod unius perferant humeri. Et iidem illi colligere hinc pergent: quemadmodum hodie sua bene relinquunt medici ciburis

utrique vero pharmacopoeis, adaeque istius instituti commo-
da sensisse procul dubio prudentiam seculi CELSIANI. Quin so-
lius chirurgiae peculiares modo partes, ceu oculariam, den-
tariam, obstetriciam, lithotomicam et ossium curatricem,
celebribus in urbibus, magno artis emolumento, a singulari-
bus exerceri viris, qui hac ratione excellentissimi facti aliis
vel spem imitandi praeriperent. Ast tamen hi ipsi ocularii,
dentarii aut obstetricii chirurgi absque omni chirurgiae ac
medicinae reliquae scientia tantum abest, ut excellere possent,
ut potius plurima inconsulto et male forent perpetraturi.
Quanto minus calleret medicus, sanitatem recte tueri sine
cognitione aliqua chirurgiae, quippe cuius lumen abditorum
tot malorum initia, progressus ac fines illustrat. Mancum
ergo et mutilum tradidissent iatrices studium ipsi illi artis
medendi antistites, nisi discipulos suos diateticen, pharma-
ceuticen et chirurgicen docuissent, quanquam totidem diuer-
sas doctrinae vniuersae quasi regiones condiderint. Aliud ta-
men esse, facile intelligitur, in his doctrinae amplissimae re-
gionibus non hospitem agere, aliud, ceu indigenam omnia
et singula penitus nosse; aliud item rem scire, aliud, exer-
citiis dextri facilitatem consecutum esse. Magnos magna
decent, et excitata noscuntur ingenia, quae studii calcem mi-
nus breuem sed longi decursus sibi figunt. Quo ipso nomine
TIBI denique plaudo inter celebritatem nouorum bonorum.
Scis meum animum, quo forte commendatus TIBI haerebo.

Vale. Dabam Elmstadii d. XXVIII Sept.

MDCCLXVI.

* * *

VIRO PRAENOBILISSIMO ATQVE DOCTISSIMO
MARTINO IACOBSEN
SVMMORVM IN MEDICINA HONORVM CANDIDATO
DIGNISSIMO

FAMILIARI AC NECESSARIO MEO AESTVMATISSIMO

S. P. D.

IOANNES AVGVSTVS-MATTHIESSEN
IVRIS VTRIVSQUE LICENTIATVS.

Ita mihi, quae opto, omnia feliciter contingant, ut quae TIBI hodie summos in Medicina honores capeffenti dicam, non reperio. Gratulerne hos TIBI honores, an laudem, praedicemque de TE, quae laudari praedicarique vix unquam satis a me posse intelligo? Neutrum faciam. Alterum namque adeo est vulgare adeoque tritum, eo ut si uterer scribendi argumento ne et TIBI et ipse mihi molestiam crearem, verendum sit. Alterum vero eiusmodi est, ut laudes TVAS TVAE in me merita praedicare nequeam, quin humilem me assertatorem lectores sint existimaturi. Quis enim mihi crederet, iussis TVAM doctrinam laudibus extollenti TEque ex animi mei sententia amicis ipsis meis fratribus ipsaque mea vita cariorem dicturo? Cum igitur utroque scribendi argumento me videam destitutum, nihil restat, nisi ut quae TIBI quantumvis audire recusanti saepe privatim dixi, ea nunc publice repetam, consitearque, me nimirum, cui mortalium cum in litteris, praesertim humanioribus, tum in ceteris, quae ad amicorum officia pertinent, plus deberem quam TIBI, habere neminem, meque inde per omnem vitam meam TVI futurum studiosissimum. Vale.

Dabam Helmstadii d. XXVIII m. Sept. MDCCLXVI.

VIRO PRAENOBILISSIMO ATQVE DOCTISSIMO
LAVREAE DOCTORALIS CANDIDATO

LONGE DIGNISSIMO

AMICO INTER PAUCOS SVAVISSIMO

S. P. D.

CHRISTOPH. AVG. FRANC. HEVMANNVS

BRVNOVICENS. MED. CVLT. ET OPP.

Exoptatissimam hanc occasionem, animi mei in TE obstrictissimi declarandi eo libentius arripio, quo gravius amicitiae est momentum, omnia, quae amico eveniunt fausta, propriae sibi ducere fortunae. Quid igitur mihi iucundius unquam obtingere potuit, quam
ami-

amicum in cathedram adscendentem, summisque in arte salutari honoribus omnium sane applausu coronandum concomitari. Gratulor itaque TIBI, Amice suavissime, lauream doctoralem diu iamam promeritam: Gratulor omnibus TVIS, de honore, qui ex doctrina, qua ornatus es eximia, in ipsos redundaturus est certissimus. Gratulor patriae TVAE de medico, qui scientia civium sanitatis conservandae apissaeque restituendae imbutus est perampla: Gratulor denique et mihi de amico virtutibus acque ac doctrina exornato. Reliquum quod est, omnia omnis generis bona largo in TE defluant rivo, optimus iubeat Deus. Vivas diu sanus terque quaterque felix, mibique ut amicitiam, qua hucusque me es complexus, conserves, summa meorum est votorum. Ad me praeterea quod attinet, meritum TVORVM semper me fore cultorem persuasum habear opto. Dabam
Helmstädti 1766. d. 28. Sept.

VIRO PRAENOBILISSIMO ATQUE DOCTISSIMO
MARTINO IACOBSEN
MEDICINAE DOCTORANDO DIGNISSIMO
AMICO SVO SVAVISSIMO

S. P. D.

E. G. NEVMEISTER, HAMBVRGENSIS
MED. C. ET OFF.

Mihi nomen veri amici deesset, VIR PRAENOBILISSIME si hanc occasionem, cum praemium eximiae TVAE doctrinae summos in arte salutari honores capeſſis, TIBI animi mei adfectus publice declarandi, avide arripere nollem. Intellego luculenter benevolentiam in me TVAM, cum in eo, quod publice edis, praeclaro eruditionis TVAE specimine dissentientis mihi munus dedisti. Persuasum habear, hoc munus, magis ad admirandam egregiam TVAM scientiam quam ad refutandas nonnullas Theses TVAS, a me acceptum esse. Gratulor itaque TIBI, Amice dilectissime! de amplissimo Doctoris gradu, quem TIBI Gratioſa Medica Facultas attribuet. Maſte virtute TVA eſto, revertere in patriam feliciter! Omnia TIBI prospere succedant, DEVS T. O. M. largiatur TIBI numerosam annorum seriem, ut diu sis patriae TVAE ſalus, diu splendidae Familiae TVAE decus atque ornamentum, diu denique amicorum TVORVM solatium.

Vale, faveque mihi TVI etiam absentis studioſiſſimo. Dabam in Academia Iulia Carolina, die XXVIII. Septembris A. R. S. MDCCCLXVI.





DISSERTATIO INAVGVRALIS
DE
ANTIQUA
MEDICINAE IN TRES PARTES
DIVISIONE.



§. I.

t humana omnia, minima maxima,
mutationi temporumque vicissitu-
dinibus subiecta sunt: ita scientias
quoque, cunctas singulasque, ei-
dem huic mutationi minime exem-
ptas esse, omnes omnium discipli-
narum historiae docent. Vt enim omittam reli-
qua, quot et quantas mutationes, transformatio-
nes, quin dilacerationes passa fuit illa ipsa reli-
qua-

A



quarum disciplinarum veluti magistra, Philosophia, quae a multis variisque, quos habuit, auctoribus modo corrupta, modo etiam emendata sic fuit; ut longe alia, quam habebat olim, faciem iam nunc appareat.

§. II.

Idem igitur rei medicae accidisse, eo minus est mirandum, quo magis hanc cum illa quondam arctissime coniunctam fuisse, constat inter omnes. Quin etiam nunc artem nostram philosophiae partem non inepte dixeris, quantumvis per tot iam secula seorsum et tradita a doctoribus et ab alumnis percepta fuerit. Quum enim rerum corporearum scientia philosophiae pars ea sit, quae in corporis cuiuscumque deum adeoque humani quoque *οἰκονομίαν* inquirat, eamque explicet; non video, quidni omnem rem medicam ad philosophiam quodammodo referri posse, recte existinem. Ex quo interim medicinam a philosophiae studio separavit, eamque sibi posterisque suis seorsum tractandam putavit Hippocrates; vario modo, diuersisque temporibus haecce ars et definita et diuisa fuit. De definitione autem dicere cum ab instituto meo alienum sit, adeoque nihil attineat, de sola diuisione quaedam nunc differere mihi liceat.

§. III.

Iam vero artem medicam, cum a veteribus, tum a recentioribus varia ratione variasque in par-

partes diuisam fuisse, neminem fugiet eorum, qui vel mediocrem aliquam historiae litterariae medicae operam dederunt. Praesertim veteres in constituendis medicinae diuisionibus copiosi fuerunt; quod intelligere est cum ex aliis eorum libris tum ex eo Galeni, qui *de artis medicae partibus* inscribitur. Quarum autem veterum diuisionum nonnullae videntur paullo obscuriores, aut ita certe comparatae, ut non facile intelligas, quomodo accipere eas aut interpretari oporteat. Quod non aliunde esse dixerim, quam quod veterum cum Graecorum tum Romanorum monumenta partim perire integra, partim vero ad nos misere truncata, adeoque manca peruenerunt, ut saepe nec auctorum, quorum scripta habemus, nec ipsarum disciplinarum ab ipsis cultarum vera ratio satis perspicue hodie percipi queat. In his interim antiquis diuisionibus explicatu haud facilibus recte fortassis numeraueris illam medicinae in tres partes siue diductionem siue diuisionem, quam prae ceteris etiam CELSUS habet praef. in libr. I. ubi *iisdem*, inquit, *temporibus in tres partes medicina diducta est: ut una esset, quae victu: altera, quae medicamentis: tertia, quae manu mederetur. Primam διατητικὴν, secundam φαρμακευτικὴν, tertiam χειρουργικὴν* Graeci nominauerunt. Hunc locum sua premi difficultate, aut ab omni certe obscuritate non esse liberum, nisi per se intelligitur, ex dissensu tamen eorum apparet, qui ad eum explicandum aggressi sunt. Varii autem iidemque magni nominis viri in



adscriptis Celsi verbis explicandis ita sunt versati, vt qualem diuisionem hic intelligi voluerit auctor, inquirerent. Quorum vero alii cum in diuidenda hac artis nostrae diuisione ab aliis discrepent, vt, cuius potissimum sententiam amplectare, non omnino appareat; haud me operam lusurum existimaui, si laudatum Celsi locum huius dissertationis meae argumentum facerem, etiam, quae mihi quidem hac de re videantur, prolaturus in medium. Ad quod perficiendum antequam ingrediar, forte non abs re fuerit, si, quid de hoc loco alii senserint, breuiter exposuero.

§. III.

Inter eos itaque, qui supra excitatis Celsi verbis lucis aliquid adfundere studuerunt, principes facile nominari merentur DAN. CLERICVS et IO. HENR. SCHVLTZE, magni illi duumviri, deque historia litteraria medica praeclare meriti, quorum vterque de hac medicinae in tres partes diuisione et reliquis scripsit fusius et peculiare caput, huic dicatum, scriptis suis inseruit. Horum igitur virorum sententiae, quantumuis diuersae cum ita comparatae sint, vt earum alterutram sequantur auctores reliqui; age proponamus eas, quò binis his iudiciis nostrum quidem deinde interponere, possimus. Incipiamus a CLERICO, qui *hist. medic P. II. libri I. cap. 9.* quo eius de diuisione nostra iudicium continetur, a) *medicinae in tres professio-*

a) Partage de la medecine en trois Professions.



seffiones partitionem inscripsit. Ex quo ipso titulo, quorsum auctor tendat, quodammodo iam potest intelligi. Nimirum ita medicinam temporibus Herophili et Erasistrati diuisam, aut potius distractam fuisse arbitratur, vt tria distincta munera medica, adeoque tres a se inuicem diuersae sanantium formae existerent, *diaeteticorum* puta, *pharmaceutarum* et *chirurgorum*, quorum singulorum etiam descriptionem exhibet. Qui diaeteticen exercebant, eos in curandis internis tantum morbis, quorum causae intrinsecus quippe herentes explicatu difficiliores esse solent, occupatos fuisse, contendit, similesque his, quos hodieque *clinicos* vocamus. Quam ob rem, et quoniam praeterea etiam naturali philosophiae operam dabant, ad *diaeteticos* tanquam eminentes inter medicos, reliquosque et eruditione et honore superantes principatum defert. *Pharmaceutas* deinde id tantum existimat operam dedisse, vt sanguinem sisterent, vulnera sanarent aperta, vlcera porro, tumores, abscessus, vno verbo, ea corporis mala tractarent, ad quae tollenda solus medicamento- rum externorum vsus et applicatio sufficeret, reliqua omnia, quae instrumentorum opera indigebant, *chirurgis* relinquentes, quibus secantibus tantummodo vrentibusque, secundum Celsum, vt putat, ne vulnerum quidem, multo minus autem vlcera tumorumque sanationem suscipere licuit, nisi, quatenus in his incisione erat opus.

§. V.

Hausit vir optimus hanc opinionem, ceu ipse fatetur, ex Celiō, qui, cum suos de re medica libros in tres partes descriptos secundum hanc in totidem partes diuisionem disposuerit; facile lectorem minus cautum eo potest perducere, vt cum cel. CLERICO in eadem sententia sit. Praesertim in nonnullis praefationibus quaedam reperiuntur, quae sententiae huic aliquid addere roboris videntur. At vero, longe tamen aliter res sese habere, cum aliunde constat, tum ex iisdem Celsi praefationibus potest intelligi, vbi de singularum diuisae medicinae partium cultoribus differens ea profert, in quibus quiduis potius, quam eiusmodi medicinae distractionem, aut talium tamque arcte limitatorum munerum descriptionem deprehendi posse, dixerim. Quodsi enim tale quid innuere voluisset, non dubito, quin longe clarioribus verbis vsus diuersa ista munera eadem descripsisset perspicuitate, qua *praef. in libr. VII.* qualis bonus esse chirurgus debeat, exposuit. Celsum autem de eiusmodi diuersis professionibus describendis ne per somnium quidem cogitasse, ea quoque testantur, quae cel. SCHVLZIVS disputat *hist. medic. Part. II. c. V. §. 3.* vbi Celso autem, inquit, in animum non venisse, vt dicere vellet, medicinae totum corpus dissectum quasi aut distractum in tres disiunctas partes fuisse, quisque attente eum legit, statim intelligere debet; et tota historia, quam haecenus persecuti sumus, docet, non solum Hippocratem, Dioclem, Pra-

Praxagoramque aequae victu praescribendo, ac medicamentis et chirurgiae praesidiis hominibus profuisse; verum etiam Herophilum et Erasistratum, atque ab his deductos viros, itemque Empiricos, qui rationalem disciplinam abdicauerant, non minus victu, quam medicamentis et manuum instrumentorumque opera, pro ea ac necessitas postularet, aegris succurrisse. Haecenus ille; qui suum hac de re iudicium aliis quoque argumentes confirmare annititur. Accedit, quod GALENVS, PLVTARCHVS, alii qui, vt postea videbimus, partitionis nostrae aequae mentionem fecerunt, ne verbum quidem habent, quo laudati CLERICI sententia vel aliquo modo posset confirmari. Hinc, quin cel. viri opinio omnino improbanda sit, equidem non dubito.

§. VI.

DAN. CLERICVM longo agmine secuti sunt alii, vt ANDREAS OTTOMAR GOELICKE *b)*, GOTTLIEB STOLLE *c)* rel.; quorum autem placita hic referre superuacaneum foret, quoniam hi scriptores sui tanquam antesignani sententiam, aliis licet verbis expressam, protulerunt. Quibus igitur praetermissis, proximum est, vt de iudicio dicam, quod de memorabili nostra medicinae in tres partes diuisione tulit supra iam laudatus IO. HENR. SCHVLZIVS, quod plane ab illa cel. CLERICI

b) histor. medic. vniuersal. Period. VI. §. 154. sqq.

c) Einleitung zur Historie der medicinischen Gelahrtheit pag. 29. §. 26.



RICI aliorumque hunc sequentium opinione diuersum est. Is namque omnem eiusmodi medicinae in diuersas professiones distractionis ideam de medio tollit, et Celsum dicto loco nihil aliud indicare voluisse contendit, quam quod medicina Herophili et Erasistrati temporibus maiora ceperit augmenta, magisque quam antea, per singulas partes suas, aucta atque culta fuerit. Quam quidem sententiam *hist. medic. Period. II. c. V. §. 2* his quidem verbis profert. *Notanter autem Celsus dicit DIDUCTAM ESSE, quod quidem ex usu latinae linguae idem esse, mihi quidem videtur, ac si dixisset, compressas antea et contractas artis salutaris partes, postquam illa ab Aesclepiadis primum, deinde Philosophis liberata fuit (quorum illi eam superstitionibus innexam tenebant, hi tanquam parergon tractabant, et sophisticis disputationibus irretiebant) amplius sese explicuisse, quemadmodum flores tempestiue diducuntur, aut compressa manus explicatur, omnesque suas partes pulcre liberèque ostendisse; atque, ut uno verbo dicam, quicquid ad perfectionem partium suarum requiri poterat, breui consecutam esse.* Haec SCHULZIVS. Iam etsi non ii sumus, qui tantorum virorum placitis et auctoritatem et fidem habentibus aduersari iure nos posse existimemus: tamen, quoniam saepe, praesertim in historicis, ἀμαρτανει και σοφῶς σοφωτερος, ut est apud Aeschilum; Schulzianis his modeste addere nonnulla mihi liceat.

§. VII.

Primum igitur vir celeberrimus non rite ver-
fari mihi quidem videtur in *τ& deducta in partes* in-
terpretatione; quae quidem verba ita accipit, qua-
si apud CELSUM nihil aliud, quam *aucta magis,*
culta aut locupletata per partes significant; quod se-
cus esse ex mox dicendis apparebit, ubi illud *didu-*
cere cum diuidere idem esse demonstrabimus. De-
inde vero Schulziana haec verborum Celsi inter-
pretatio eiusmodi est, ut, si eam omni ex parte
probes, artem salutarem Herophili et Erasistrati
temporibus reapse diuisam fuisse, omnino negan-
dum sit. Quod si enim Celsum nihil aliud indicas-
se concedas, nisi quod medicina tum temporis
maiora ceperit incrementa, sequitur, ut veram
eiusdem in partes diuisionem qualemcunque de-
mum innuere hic noluerit. Quod autem quin re-
uera fecerit Celsus, cum, ceu statim videbimus,
dubitari nequeat; facile intelligitur, clarissimi viri
sententiam mancā, adeoque non vsquequaque
probandam esse. Quemadmodum igitur CLERI-
CVS, diuersas istas professiones seu munera medica
sibi fingens, definitionem nobis exhibuit re defini-
enda latiore; ita SCHVLZIVM nostrum laudatum
Celsi locum limitasse iusto arctius, ac pro inde ex-
plicationem re explicanda angustiore dedisse di-
xerim.

B

§. VIII.

§. VIII.

His aliorum iudiciis, sequitur nunc, vt equidem addam meum. Diu multumque de supra adscriptis Celsi verbis rite interpretandis mecum cogitavi, operamque dedi, vt omnem potestatem ac vim iis subiectam, quantum eius a me fieri posset, eruere, atque intelligere, vtrum medicina *Herophili et Erasistrati* aevo reapse diuisa fuerit, nec ne; et si diuisa fuit, quomodo hoc factum, quatenam singularum diuisae medicinae partium vera ratio, quidue vnique earum proprie esset tribuendum. Hinc primum adii historiae medicae scriptores eosdemque praecipuos; quorum tamen, si quod res est dicendum, mihi fateor satisfacisse neminem. Deinde circumspexi auctores alios, praesertim veteres CELSO vel aequales vel haud adeo multum ipso iuniores, si forte in his aliquid offenderem, quod ad dissipandas faceret quasi nubeculas, quibus CELSI verba, mihi quidem, tecta videbantur et obtusula. Quae igitur partim legendo, partim vero meditando, variasque rationes huc pertinentes inter se comparando, animaduertisse mihi videbar, ex iis nata est sententia qualiscunque, cuius proferendae nunc faciam initium.

§. VIII.

Ante omnia autem requiritur, vt artem salutarem temporibus istis reipsa fuisse diuisam demon-

monstremus. Cuius rei necessitatem nobis imponunt ii, qui cum clar. SCHVLZIO verbis *diducta in partes* apud CELSUM nihil aliud indicari volunt, nisi, medicinam *iisdem temporibus* multorum industria auctam per partes tantum modo magisque quam antea cultam fuisse; quique adeo, ut supra iam dictum est, omnem diuisionis ideam reddere dubiam, ac tantum non tollere de medio videntur. Illud igitur *deducere in partes* idem esse, atque *diuidere in partes* cum ipse Celsus testetur, tum idem ex veteribus reliqui docent, apud quos utramque formulam, ausim dicere, eiusdem ubique significationis esse. Verum est, verbum *deducere* per se et seorsim spectatum contrarium esse *contrahere*; adeoque haud raro non significare nisi *dilatare, extendere* seu *maius reddere* aut *latius*. At enim vero, quoties hoc verbum vocibus *in partes* iunctum deprehendatur, toties apud veteres latinos, quod sciam, nunquam non *diuisionem* quin distractionem denotat. Celsus autem τὸ *diducta* excitato loco idem esse atque *diuisa*, ex eiusdem praefatione his verbis potest intelligi. *Sic in duas partes ea quoque, quae victu curat, medicina diuisa est* — ubi τὸ quoque non scripturus fuerat, nisi superiori etiam loco veram diuisionem intelligi voluisset. Plurima ex aliis veteribus exempla ad rem nostram facientia huc possem transcribere, nisi studendum mihi breuitati, aut parcendum lectoris patientiae esset. Vnum tamen adferam, quod est apud Horatium art. poet. v. 325.



Romani pueri longis rationibus assem

Discunt in partes centum *diducere* —

Vide etiam ERASM. ROTER. *de copia verbor. ac rerum in diuidendi form.* Quae cum ita sint, quin Celsus medicinam dicto loco reuera diuisam dixerit, amplius non erit dubium.

§. X.

Postquam igitur Ciceronem nostrum veram artis medicae diuisionem innuisse demonstrauimus, sequitur nunc, vt, quomodo diuisa fuerit h. e. qualem diuisionem hic intelligere nos oporteat, videamus. Scilicet varia ratione, varioque respectu de arte salutari, eam esse diuisam, potest dici, ac proinde varia constituere diuisionum genera licebit, e quibus sententiae nostrae clarius explicandae causa, tria potissimum nominasse sufficiet. Primum quidem illud est, quod in scholis adhiberi solet, et secundum quod medicina hodieque dispescitur in *theoreticam* et *praeticam*, quae deinde partes scientiae nostrae maiores porro in minores solent diuidi. Qua diuidendi ratione scientiarum magistros constat uti ordinis causa, quem in rebus suis cum docendis tum discendis seruari volunt; quapropter huiusmodi diuisiones *scholasticas*, *mentales*, seu etiam *logicas* recte dixeris. Alterum deinde diuisionum genus est eiusmodi, vt non tam ipsam artem diuidat, quam ipsius cultores, qui de certis rei suae principiis siue capitibus



tibus inter se dissentientes ideoque diuersas sequentes opiniones in varias et distinctas abeunt partes, sectasque constituunt: quo vetus illa medicinae in rationalem et empiricam diuisio seu diuulsio potius referenda est. Tertium denique genus illud esto, quod diuersa sanantium munera facit, quo medici, vt hoc vtar, olim distinguebantur ab iatraliptis aut hodie medici clinici a chirurgis, balneatoribus cet. diuersi sunt. Huius generis diuisio, quam verius medicorum munerum distinctionem dixeris, iterum non tam ad ipsam artem pertinet, quam ad eius cultores, siue ad diuersam diuersorum in facienda medicina constitutorum mendi rationem, qua in homine sanando vel conseruando in vniuersum opus est.

§. XI.

His praemissis, veluti sponte, quodnam ex constitutis diuisionum generibus Celsus innuere voluerit, quaestio oritur. Quod si cel. CLERICVM audias, qui professionem salutarem ita diuisam arbitratur, vt tres minores quasi professiones inde existerent, quin illud, quod extremo posuimus loco, indicauerit, non erit dubium. At vero si consideres, primum, eum sententiae suae argumenta in ipsis Celsi libris h. e. ibi quaesiuisset, vbi nulla eiusmodi argumenta sunt, et deinde addas, quae disputauimus supra, tales nempe pharmaceutas et chirurgos, quales ipse nobis depinxit,

vix vnquam degisse inter mortales; vel me non monente apparebit, non esse, quare magni ceteroquin viri hac super re opinionem et auctoritatem sequi velimus. Neque vero genus illud, quod secundum diximus, locum hic posse habere, facile intelligitur. Quis enim temporibus Herophili et Erasistrati diuisa medicina sectam *διατητικην*, *φαρμακευτικην* aut *χειρουργικην* ortam dixerit? Quantumvis enim inter medicos veteres fuisse constet et qui dietam pluris facerent, quam medicamenta et qui his plus in sanandis morbis quam dietae tribuerent; idcirco tamen hos medicos diuersas constituisse sectas adfirmare minime licebit. Quare nihil restat, nisi vt laudatam Celsi diuisionem eius generis esse existimemus, quod omnium primum fecimus; quo referuntur siue partitiones siue diuisiones eae, quas *logicas* seu *mentales* vocant.

§. XII.

Etiam si autem sententia nostra ex haecenus dictis sic satis probabilis videatur facta; ad eam tamen vltius confirmandam nonnulla aliorum scriptorum testimonia adduxisse iuuabit. Plures noui ex recentioribus fuisse, qui in eo mecum conuenirent, vt diuisionem nostram aequae logicam existimarent. Sed, praetermissis his, ex ipsis veteribus nonnullos excitabo, qui fide eo sunt digniores, quo ipsos CELSI temporibus fuisse pro-

propiores constat. Horum primus esto *Galenus* noster, qui initio libri DE PART. ART. MEDIC. Sunt enim quidam, inquit, quos possis audire secantes totam artem in pharmaceuticam et chirurgicam et dieteticam i. e. in eam, quae medicamentis, et eam, quae manuum opera, et eam, quae victus ratione medetur; et haec deinde in alias partes: non tamen, ut omnes mox eodem modo eas partiamur. Quibus verbis, nisi plane fallor, intelligitur, hanc vniuersae rei medicae in tres partes diuisionem ab hominibus medicinam docentibus adhibitam fuisse. Primum enim per *secantes*, meo quidem iudicio, non intelligit, nisi eos, qui in arte nostra vel viua voce vel scriptis etiam suis illustranda versabantur, adeoque bona rei suae diuisione non minus quam definitione carere poterant; id quod τὸ. audire *GALENI* non obscure indicat. Deinde hanc medicinae diuidendae rationem ait eiusmodi esse, ut nemo eadem uti cogatur, sed ut medicis artem suam vel eodem modo vel aliter etiam partiiri liberum sit. Hinc quid efficitur, nisi ut diuisionem hanc, quippe arbitrariam, inter diuisiones mentales numerari oporteat. Plura ex *Galenii* libris huc spectantia adferre possem, si tanti esset, et nisi vnum illud, quod modo adduxi, ad sententiam meam roborandam sufficere arbitrarer.

§. XIII.

Audiamus vero testem alium, PLUTARCHVM dico, qui vniuersam seculi sui medicinam HOMERO iam notam fuisse demonstraturus diuisionem nostram, alio quamuis modo profert *libr. de Homero p. 104. edit. Xilandr. vbi medicinae*, inquit, *altera est pars in contemplatione posita* (θεωρητική) *quae vniuersalibus rationibus, certa- que via doctrinae ad singulorum cognitionem perdu- cit: altera est effectrix*, (πρακτική) *quae opus facit: cuius partes sunt, victus rationem praescri- bens, manuum opera utens, et medicamenta adhi- bens.* Hoc loco diuisionem indicari logicam pri- mum, non est, quod moneam. Deinde et hoc intelligi hinc posse dixerim, hanc ipsam partiti- onem Plutarchi temporibus inter omnes reliquas medicinae diuisiones praecipuam fuisse, et a me- dicis frequentissime adhibitam. Ipse namque Plutarchus de HOMERO eiusdemque rei medicae peritia scripturus ex plurimis artis nostrae diui- sionibus suo aevo notis hanc potissimum, meo quidem iudicio, non electurus fuerat; nisi eam inter reliquas vel optimam vel notissimam iudi- casset. Utut autem est, tamen ex haecenus di- ctis vtramque et GALENI et PLUTARCHI diui- sionem esse logicam patet. Quod cum ita sit, quid impedit, quo minus etiam CELSI diuisionem logicam putemus, praesertim quum apud eundem neque medicae distractionem in sectas, neque
eius



eius in diuerſas profeſſiones diuiſionem intelli-
gere tuto liceat.

§. XIII.

Ceterum Celsus diuiſionem noſtram iſdem
h. e. Herophili et Eraſiſtrati temporibus adeoque
poſt Hippocratis obitum fuiſſe natam perhi-
bet: licet, quo auctore, aut ubi terrarum id fa-
ctum ſit, non addat. Equidem hanc artis no-
ſtrac partitionem iſs temporibus paullo antiquio-
rem, quippe a Platone prolatam, ac proinde vi-
uente Hippocrate iam uſurpatam dixerim. Quod

ut credam adducor iſs, quae inter Platonis pla-
cita commemorat Diogenes Laertius lib. III.
p. 89. τῆς ἰατρικῆς, inquit, εἰς αἰδὴ πέντε ἢ

μὲν Φαρμακευτικὴ ἢ δὲ χειρουργικὴ ἢ δὲ διαιτη-
τικὴ ἢ δὲ νοσογνωμονικὴ ἢ δὲ βοηθητικὴ ἢ μὲν
Φαρμακευτικὴ διὰ Φαρμάκων ἰᾶται τὰς ἀρρώ-
ſιας. ἢ δὲ χειρουργικὴ διὰ τῶ τέρπειν καὶ κατεῖν
ὕγιαſει. ἢ δὲ διαιτητικὴ διὰ τῶ διαιτᾶν
ἀπαλλάττει τὰς ἀρρώſιας. d)

Hinc igitur
conſequitur, ut diuiſio noſtra non Herophili
dumum temporibus primum orta ſit, ſed iam
aeuo Hippocratico, aut Platonico, ni medicis,
philophis certe, magnam partem fuerit cog-
nita. Quo conſeſſo veriſimile eſt, eam e Plato-

C

nica

d) vide Galeni lib. ad Traſibulum, c. 24. ubi haec Laertii con-
firmantur.

nica schola transisse ad medicos, qui deinde in hac partitione disciplinae suae accommodanda proferendaque mire varii fuerunt. Alii namque *διατητην*, *Φαρμακευτην* et *χειρουργικην*, teste GALENO, primas medicinae maximasque partes dixerunt, quod idem quin etiam Celsus fecerit, equidem non dubito. Alii, praesertim empirici, medicinam a fine in *significatiuam*, *curatricem* et *medicam*, quae dicitur *salubris*, diuidentes in dictas tres partes *curatricem* descripserunt. Fuerunt etiam, qui, sicut Plutarchus, his partibus constare *medicinam effectricem* dicerent. Interim, quin PLATO huius diuisionis tanquam primus auctor considerandus sit, Laërtii verba, Platonis quippe placitum exhibentia, vix dubitare nos sinunt.

§. XV.

Hactenus de diuisione nostra in vniuersum egimus. Quoniam vero Celsus noster partitionem hanc verisimiliter eo est usus, vt secundum eam tanquam normam aliquam vniuersae aëui sui medicinae quasi imaginem exhiberet; age nunc quatenam singularum partium vera ratio sit, quidue earum quaelibet sibi habuerit proprium, perquiramus. Incipiamus a parte *διατητην*, h. e. ea, quae victu curat. Huius partis ad eamque pertinentium rerum veram ideam non aliunde tutius peti posse dixerim, quam ex ipso Celso, cum quia ipse primis quatuor libris *διατητην*, meo

meo quidem iudicio, exposuit vniuersam, tum;
 quoniam ex aliis veteribus, qui de hac parte eo-
 dem egisset modo, noui omnino neminem. Nam
 HIPPOCRATES GALENVS, rel. scripserunt illi
 quidem de rebus diaeteticis, non tamen sic, vt;
 quemadmodum fecit Celsus, *διατητικῶν* tan-
 quam primam maximamque medicinae partem
 constituerent. Celsum igitur qui sequi velit, is
 ad partem hanc referat oportet, praeter bal-
 neorum, victionis, frictionis cet. vsum omnem
 doctrinam de morbis internis, quorum causae
 explicatu difficiles sunt, et quibus victus ratio;
 Celso teste, maxime subuenit. Quin omnem ho-
 diernam medicinam theoreticam dictis quatuor
 libris utcumque expositam deprehendi posse dixe-
 rim. Hinc partem hanc a Celso vt difficillimam,
 sic etiam clarissimam dici, non est mirandum.
 De cetero notandum est, insignem illam medici-
 nae in *empiricam* et *rationalem* diuisionem in hac
 tantum parte, non in reliquis quoque, fa-
 ctam esse. Res namque, de quibus a rationali-
 bus dissentiebant empirici ad solam pertinebant
διατητικῶν; vnde IO. ARGENTERIVS in *Clarid.*
Galen. art. medic. comment. I. de corp. suo quo-
 dam iure erroris conuincit auctorem *introduc.*,
 qui sectae rationalis auctorem et conditorem fa-
 cere Hippocratem non dubitat. Ad medicos
 denique qui in hac parte vel exercenda vel colen-
 da magis olim versati sunt, quod attinet; Celsus

eos viros dicit fuisse longe clarissimos, qui altius etiam quaedam conati, rerum quoque naturae sibi cognitionem vendicarent, tanquam sine ea trunca et debilis medicina esset. Hinc factum, vt recentiores in vniuersa veterum medicorum veluti censura ad diaeteticos principatum deferrent, eosque tales fuisse contenderent, quales moderni nostri clinici sunt. Quam quidem opinionem etsi non reprehendimus; tamen tantum inter diaeteticos et reliquarum partium cultores olim interfuisse, quantum hodie inter medicos clinicos, pharmacopoeos et chirurgos intercedere, discriminis constat; id quod nonnulli haud obscure innuunt, a nemine satis demonstrari posse contenderim.

§. XVI.

Sequitur *Φαρμακευτική*, quam Celsus ait medicamentis curantem, seu, vt alibi dicit, quae magis medicamentis pugnat. Haec igitur pars quin exposuerit, primum, de viribus et facultatibus medicamentorum cum internorum tum externorum, et deinde de iis laesi corporis humani malis, in quibus medicamentorum maior quam diaetae manuumque operae vis esset, non est dubitandum. Nihilo tamen secius ex recentioribus aliqui *Φαρμακευτικήν* multo circumscripserunt arctius, ei quippe externorum tantum medicamentorum vsum tribuentes, quoniam, opinor, ea quae Celsus *libr. 5 et 6* protulit, maximam

ximam partem externa sunt. Hinc etiam accidisse reor, ut nonnulli, medicinam nescio quam mutilam et truncam sibi fingentes, *diætetico* architectonico quasi iure in reliquarum partium cultores vfos, hos autem qui ad *Φαρμακευτικήν* a scriptoribus referuntur, in sanandis apertis tantum vulneribus, vlceribus reliquisque externis nec igne nec instrumentorum opera opus habentibus occupatos fuisse arbitrarentur. At enim vero, præter quam quod eiusmodi *pharmaceutas*, ut eos CLERICVS vocat, a nonnullis CELSI lectoribus non satis cautis fictos et quasi creatos fuisse; iam docuit vir clariss. SCHVLZIVS; e) alia omnia ipse quoque Celsus innuit *præf. in libr. 5. Dixi, inquit, de his malis corporis, quibus victus ratio maxime subuenit, nunc trans-eundum ad eam medicinae partem, quae magis medicamentis pugnat. Quod, aut egregie fallor, aut idem est, ac si dixisset, Φαρμακευτικής* tanquam obiectum ea corporis mala esse, quorum sanatio maxime medicamentis eget. Quibus vero in malis cum etiam sint, quae haereant intrinsecus; ac proinde tolli sine medicamentis internis omnino nequeant; nec horum, intus nempe adhibendorum remediorum vsum ab hac parte arcendum esse, facile intelligitur. Quantumvis autem *Φαρμακευτική* medicamentorum et internorum et externorum vsum sibi habuerit

e) *compend. hist. medic. libr. II. c. 10.*



proprium: eam tamen nec victus ratione nec
 manuum opera plane carere potuisse Celsus dicit
 eadem in *libr. 5* praefatione. *Id antea omnia in-*
quit, scire conuenit, quod omnes medicinae partes
ita connexae sunt, vt ex toto separari non possint;
sed ab eo nomen trahant, a quo plurimum petunt.
Ergo vt illa, quae victu curat, aliquando medica-
mentum adhibet; sic illa, quae praecipue medicamen-
tis pugnatur, adhibere etiam rationem, victus debet;
quae multum admodum in omnibus malis corporis
proficit. Hinc consequitur, vt trium partium al-
 tera sine auxilio et notitia alterius nec percipi
 nec doceri adeoque ne coli quidem potuerit.
 Quod cum ita sit, quin ii, qui in *Φαρμακευ-*
τικῇ vel exercendam vel suis illustrandam scri-
 ptis incumbabant, quosque *Φαρμακευτικῆς*
 appellare mihi liceat, reliquarum quoque parti-
 um ideoque vniuersae medicinae periti fuerint,
 non est dubium. *Φαρμακευτικῆς* itaque a *δια-*
τητικῆς, ausim dicere, non distinctos fuisse nisi
 studio, sic nimirum partem *Φαρμακευτικῇ*
 colentes illustrantesue scriptis suis, quemadmo-
 dum illi colebant *διατητικῇ*; licet non negaue-
 rim, inter *Φαρμακευτικῆς* studiosos etiam fuisse,
 qui in tollendis morbis dietam prae medica-
 mentis contemnerent, haecque in aegrotis qui-
 buscunque demum sanandis vtramque facere pa-
 ginam arbitrantur; adeo, vt, quemadmodum
 Celsus refert, sine medicamentis nullum morbi
 genus

genus curarent. A medicis denique *Φαρμακευτικοίς* distinguendos esse pharmacopolas, *επιστόμους*, seplasiarios et id genus alios, forte non est, quod addam. Haecenus autem de parte *Φαρμακευτική*.

§. XVII.

Restat, ut de *χειρουργική* dicam, seu ea medicinae parte, quae manu curat. Etiam huius partis fines nonnulli iusto constituunt arctiores, siquidem ei nihil praeter ignis et instrumentorum usum relinqui volunt. Itaque non potuerunt non *chirurgos* nobis describere, qui ut cel. SCHVLZII verbis utar, cauterium applicarent, incisionem facerent, fracta luxataque reponerent; ac deinde escharae procurationem, sanguinis sistendi vulnusque deligandi curam, et quibus alias porro ad plenam sanationem opus est, *pharmaceutae* traderent; quales autem *chirurgos* unquam fuisse cum eodem viro doctissimo recte negaueris. Hanc interim opinionem, parum abest, quin natam putem ex minus accurata interpretatione eorum, quae CELSVS disputat praef. in libr. I. *extrem.* Potest autem, inquit, requiri, quod huic parti proprie vindicandum sit; quia vulnerum quoque ulcerumque multorum curationes, quas alibi executus sum, *Chirurgi sibi vendicant.* Quae verba fateor posse quemvis facile eo perducere, ut idem cum illis de *chirurgis* veteribus iudicium ferat.



ferat. Quid enim inde videtur colligi posse, nisi hoc, non licuisse olim chirurgis igne tantum et instrumentis pugnantibus vulnera aperta vlceraque sanare? At enim verò perquiramus paullo diligentius quales *curationes*, qualesue *chirurgos* hic narret CELSVS, et alium horum verborum sensum esse apparebit. Scilicet per *chirurgos* hoc loco, vt mea fert opinio, non tam eos intelligit, qui chirurgiam re ipsa exercebant, quam qui eam colebant, augebant obseruationibus, suisque illustrabant scriptis; vt igitur *curationes* non tam eae hic intelligendae sint, quae reapse suscipiebantur a chirurgis, quam potius hae, quas medici chirurgici in operibus de χειρουργικῇ agentibus describebant, explicabantque. Verisimile autem est inter hosce χειρουργικῆς cultores fuisse, qui de hac parte scribentes eorum etiam vulnorum vlcerumque mentionem facerent, in quibus plus medicamentis quam manu proficitur, quaeque adeo ad partem Φαρμακευτικὴν verius quam ad χειρουργικὴν pertinebant. Et sic demum adscripta Nostri verba arbitror accipienda; alias me Celsum circa laudatae praefationis finem disputantem non intelligere confiteor. Ceterum quaestio, quatenam ad partem χειρουργικὴν sint referenda ab hac, quorumnam corporis malorum curationes medico chirurgico suscipere olim licuerit, plane est diuersa. Ad primam quidem quod attinet, equidem non possum, quin tres illas diuisae

sae medicinae partes vt tot diuersas disciplinas
 considerem, in quibus singulis magis colendis
 medici maxime studio a se inuicem diuersi olim
 versati sunt; quod Schulzianae de diducta medi-
 cinae sententiae est consentaneum, et ab ipso et
 iam Celfo confirmatur, siquidem de singularum
 partium cultoribus tanquam disciplinarum seor-
 sum cultarum professoribus hinc inde verba fa-
 cit: quin eadem in libr. 7. praefatione partem
 χειρουργικὴν disciplinam ipse appellat. Si quid
 igitur libris suis definire aut determinare voluit
 noster: eum non, opinor, quid chirurgis aut cli-
 nicis faciendum omittendumue, sed quid singulis
 diuisae medicinae partibus vindicandum docuisse.
 Itaque χειρουργικὴν licebit cum ipso Celfo defini-
 re: quae non quidem medicamenta atque victus ra-
 tionem omittit, sed manu tamen plurimum prae-
 stat. Quemadmodum igitur Φαρμακευτικὴν
 in vniuersum curationem exhibebat eorum, ad
 quae tollenda maxime opus erat medicamentis:
 sic χειρουργικὴν, arbitror, exposuisse de externis
 malis corporis, non quibuslibet demum, sed iis
 tantum, in quibus manuum et instrumentorum
 maxima vis esset. Quod si vero, vt de quae-
 stione altera nunc dicam, scire cupias, quanam
 corporis mala tractare chirurgis licuerit: non
 dubito adfirmare, eos occupatos fuisse in curan-
 dis externis quibuscunque, quae manuum ope et
 auxilio carere nequeant; adeo quidem, vt nec
 D impla-



emplastrorum nec reliquorum foris adhibendorum usum et applicationem excipi velim. Veteres autem chirurgos ad sananda vulnera, sistendumque sanguinem suamet manu medicamenta adhibuisse; prae ceteris etiam PLVTARCHVS docet supra a me laudati *libri de Homero c. 116.*, ubi de HomERICA chirurgiae peritia agit, et, MENE-LAVM ergo, inquit, MACHAON curat, *primum sagittam extrahens, deinde vulnus contemplans, atque sanguinem exprimens, ac siccantia medicamenta inspergens.* Quod non scripturus fuerat, nisi chirurgi suo florentes tempore ad sananda vulnera aliaque externa usi medicamentis essent; id quod omnino negant, qui, ut supra vidimus, chirurgorum vices magnam partem tribui pharmaceutis volunt. Sed, ut omittam nunc quae ad chirurgorum seu vulnerariorum vices et functionem pertinent, *Φαρμαευτικῆς* supra ostendi a reliquis diuisae medicinae cultoribus non distinctos fuisse, nisi secundum eius diuersarum partium rationem et differentiam: idem dicendum arbitror de medicis studiosis *χειρουργικῆς*, de quibus Celsus passim ita disputat, eos ut honore et eruditione insignes fuisse, facile intelligas.

§. XVIII.

Ex haecenus dictis itaque apparet, tres illas partes, in quas temporibus Herophili et Erasistrati medicina diducta fuit, non esse considerandas tanquam tria diuersa sanantium diuersorum mu-

munera, sed vt tot diuerſas diſciplinās, quae ſingulae poſt medicinae diuiſionem, ſiue in ſcholis, ſiue in ſcriptis medicorum factam primum ortaē, et ſucceſſu deinde temporis ſenſim paulatimque magis cultae ſuos tandem proprios profeſſores acceperunt, a ſe inuicem non diſtinctos niſi ſtudio aut partium differentia, ſicuti pathologiae doctores, vt hoc vtar, diuerſi ab his ſunt, qui phyſiologiae aut therapiae ſcriptis ſuis colendae illuſtrandae hodie operam dant. Circa Celſi certe tempora eiſmodi profeſſores vixiſſe, qui trium medicinae partium vnā alteramue ſeorſum colerent, ipſe *praef. in libr. 7.* his quidem verbis indicat: *Deinde, poſteaquam diducta ab aliis habere profeſſores ſuos coepit, in Aegypto quoque increuit, Philoxeno maxime autore, qui plurimis voluminibus hanc partem diligentiffime comprehendit. Et paullo poſt: Ac Romae quoque non mediocres profeſſores, maximeque nuper Tryphoni pater, et Euelpiſtus Phlegetis filius, et vt ex ſcriptis eiſ intelligi poteſt, horum eruditiffimus Megeſ, quibuſdam in melius mutatis, aliquantum ei diſciplināe adiecerunt. Quin ipſum Celſum eiſmodi profeſſorem Romae fuiſſe, contendere non dubitat vir* πολυμαθέ-
 5ατος GEORG. WOLFFG. WEDELIVS. *f)* Noſtrae igitur in tres partes diuiſioni idem accidiffe dixerim, quod euenire in pleriſque ſcientiarum partitionibus ſolet, quae a diuidentibus magiſtris vel in ſcholis vel in ſcriptis primum conſtitutae,

D 2

ſuc-

f) praef. in Aurel. Cornelium Celſum.



successu temporis et sequentium cultorum industria, sensim sensumque in diuersas abeunt disciplinas minores, quae iunctim sumptae maiorem, seu totum suum efficiunt. Sic notissima illa, et a medicis maxime celebrata medicinae theoreticae in quinque partes diuisio primum, quod sciam, prolata in medium est ab *Introductionis* g) vulgo Galeno adscriptae auctore, post cuius tempora singula partitionis huius membra ita culta fuisse constat, vt tanquam diuersae doctrinae et docerentur scriptis oreue a doctoribus, et ab alumniis perciperentur; adeo quidem, vt harum partium quaeuis peculiarem suum in Academiis nunc professorem habeat. Quae res quum ita sese habeant, fieri non potest, quin errent, qui C.E.L.S.V.M., saepe laudato loco, non ipsam scientiam medicam, sed medicorum practi-
corum vices et functiones diuisas innuisse contendunt.

§. XVIII.

Multo minus audiendi sunt, qui hodiernae et pharmaciae et chirurgiae rationem et vtriusque a reliquo medicinae quasi corpore separationem non aliunde deducendam existimant, nisi ex hac ipsa diuisione nostra, quam inde fatalem b) et rei medicae perniciosam appellare non dubitant. Nam primo, chirurgiam, si antiquam spectes, quis nescit omnium medicinae partium primam et vetustis-

g) c. 7.

b) vid. Andr. Ottmar Goelike *hist. medic. vniuersal. Periop. VI, extrem.*



stiffissimam i), ac proinde ipsa diuisione nostra antiquiorem esse: Sin vero nouam hodiernam; huius, tenendum est, conditionem et a medicina separationem florente aut verius incipiente Schola Salernitana seu temporibus latino-barbaris demum secutam esse: quod prae reliquis etiam obseruauit CHRISTIAN. WILH. KESTNERVS. k) Ad pharmaciam deinde hodiernam quod attinet, medicos veteres cum Graecos tum Romanos constat suamet manu praeparasse medicamenta: adeoque talibus non opus habuisse hominibus, quales hodierni pharmacopoei sunt. Non me praeterit, fuisse olim, qui merces medicas, vt sic dicam, medicis suppeditarent venderentque; quo pertinent pigmentarii, aromatarii et id genus alii. At horum conditionem et vices longe diuersas fuisse a munere, quo moderni pharmacopoei funguntur, nemo ibit inficias, qui in hanc rationem paullo diligentius inquisiuerit. l) Praeterea hodiernorum pharmacopoeorum ratio atque origo non adeo est antiqua, eam vt a CELSI aut adeo Herophili temporibus repetere liceat. Audiamus enim virum doctissimum et rerum antiquarum longe peritissimum HERM. CONRINGIUM, qui de *Hermetica medicina libr. II. c. 8. p. 293. plurimis*, inquit, *seculis caruit iis (officinis pharmaceuticis) ars medica, ipsis medentibus*

D 3

bus

i) vid. *Celsum praef. in libr. 7.*k) vide huius *kurzen Begriff der medicinischen Gelahrtheit.*

l) vide ANDR. OTTOMAR. GOELICKE disputat. de mutilo medicinae corpore resartiendo, per chirurgiam et pharmaciam postliminio reuocandas §. XVII.



bus domi pharmaca sua conficientibus. Idem mos hodieque per omnem Asiam obtinet. In Africa primum videntur medici hanc curam a sese in alios reieciſſe, ante hos quingentos amplius annos. Et paucis interiectis: Auenzoaris ſane aeuo, qui ſeculi duodecimi initio, undecimi fine, floruit, morem illum in Africa obtinuiſſe, non videtur dubitandum. Inde cum doctrinarum artiumque omni genere in Hispaniam primum mox in Europae reliqua conceſſit. Hinc igitur patet, etiam pharmaciae a medicina ſeparationem iuniorē eſſe, quam vt rationem et ortum eius apud Graecos aut Romanos quaerendam eſſe exiſtmes.

§. XX.

Si quid interim de diſtinctis veterum medicorum muneribus, diuerſisue eorūdem functionibus definire velis; ſolam chirurgiam apud Romanos aliquando ab arte noſtra ſeparatam fuiſſe, recte dixeris. Quantumuis enim veterum medicorum plerumque victum ordinare, medicamenta adhibuiſſe et chirurgiae opera exercuiſſe, hiſtorici noſtri ſcribant; nihilo tamen ſetius clinicos chirurgosque aliquid diſcriminis Romae ſaltem interceſſiſſe, forte non eſt negandum. Ipſe enim GALENVS in *medendi methode* alicubi ſe fatetur in Graecia chirurgiam adminiſtrare ſolium, Romae vero eius adminiſtrationem reliquiſſe iis, qui huic officio peculiariter ſe dabant. Quod diſcrimen inter clinicos et chirurgos

gos seu vulnerarios etiam obseruat SALOMO
 CELLARIUS in *origin. et antiquitat. medic.* C.
 III. §. 4. 5. quem igitur adi. Verum enim vero
 propterea neutiquam statuere licet, inter medi-
 cos veteres fuisse etiam, qui iure quasi archite-
 ctónico διατητην et morborum internorum
 curam sibi vendicantes malorum corporis exter-
 norum sanationem partim pharmaceutis partim
 vero chirurgis traderent. vtrisque videntes pro
 famulis. Nam vt nihil dicam de pharmaceutis,
 quorum conditionem mihi fateor ignotam esse,
 chirurgi aequae erant medici dignitate et honore iis
 non multum forte minores, qui clinici diceban-
 tur; quod prae ceteris intelligere est ex honoribus,
 quibus Romani ornauerunt virum magni nomi-
 nis ARCHAGATHVM, qui testante PLINIO
 primus e Graecia Romam venit medicus chirurg-
 gicus siue *vulnerarius*, e re ita dictus, quod vul-
 nera sanabat. Interim non nego, fuisse etiam,
 qui omnis rei medicae aut chirurgicae minime
 periti vni alteriue chirurgiae parti se totos con-
 secrarent, eamque exercentes medicis et clinicis
 et chirurgicis, quoad honorem et dignitatem, in-
 feriores essent. Discimus enim ex GALENI libr.
 de part. art. med. fuisse Romae, qui *ocularii*, *den-
 tarii*, quin *anarii* dicerentur; quos HERM. CON-
 RINGIVS *introducet. in art. medic.* tales dicit, qua-
 les nonnulli ophthalmici hodie sunt, aut illi,
 (ipsius optimi viri verba sunt) *qui vel tantum
 circa luxationes, vel ulcera, vel quodcunque de-*
 munt



num aliud corporis nostri vitium vulgo occupantur: homines ut plurimum nulla reliquarum artis partium peritia, nulla elegantiore doctrina, nulla personae dignitate instructi, sed *Βαυυγοι* et e fece Romuli. Eiusmodi medicis etiam Aegyptum abundasse HERODOTVS in *Euterpe* docet. De cetero si quis velit quaerere aut appellare medicos architectonicos, fatius erit, nomen hoc hodiernis tribuere medicis, quibus multum viliores fuisse clinicos veteres adductis rationibus demonstrat IO. ARGENTERIVS in *Claud. Galen. art. medicinal. comment. I.*

§. XXI.

Sed haec de antiqua medicinae in tres partes diuisione disputasse sufficiat. Quae cum cordato lectore communicavi, non, quo ingenii mei aciem iactarem, aut me ostenderem ceteris videre posse acutius; sed speciminis causa, et ut quasi quaererem ab eruditis, quomodo supra adscripta CELSI verba esse accipienda, numue ea, quae hac de re scripserim, probanda, an tanquam infirma et nullis nixa idoneis fundamentis reicienda putarent. Quod si quis itaque me nonnullis in rebus errasse demonstrauerit, meliora me quidem docturus, stilum vertens libenter delebo errores gaudeboque noua quasi discendi occasione, qua mihi per omnem vitam nihil esto carius.

